



## Komunikado di prensa 2019-005

### *Progreso den restrukturashon ENNIA*

## **Reakshon riba informenan den prensa**

WILLEMSTAD/PHILIPSBURG – Centrale Bank van Curaçao en Sint Maarten (CBCS) a tuma nota ku último dlanan tabatin vários publikashon den medionan di komunikashon riba e situashon di ENNIA, esaki basá riba e huisio sumario, ku Parman International B.V (Parman) a entamá kontra di CBCS un kaso públiko. Sinembargo e informenan aki a duna un bista no kompletamente korekto (eróneo) di e kaso di ENNIA. CBCS te ku awor tabata kouteloso ku sakamentu di informashon detayá ku e solo meta pa permití e proseso di restrukturashon di kana na un manera mas ordená posibel. Mirando e publikashon CBCS ta hañ'e nesario klarifiká algun echo riba ENNIA.

### **Défisit di Solvensia**

E holding (ECH) i e kompania di invershon (ECI), bou di maneho di akshonista Parman, a saka fondonan di aseguradonan for di e kompanianan di seguro (ECL, ECS i ECZ), kualnan ta Ennia Leven, Ennia Schade i Ennia Ziektkosten, te na un montante di alrededor di 1.5 miar florin (1.500.000.000 florin). Esaki ta pone ku e kompanianan di seguro ta kore un rísiko grandi pasobra nan ta dependé di e pago bèk ku ECH i ECI mester hasi na nan. Un indikashon di preokupashon ta ku e interes ku ECH i ECI lo mester a paga kompanianan di seguro, riba e plaka ku nan debe sea nan no a pag'e òf solamente un parti.

CBCS a konstatá ku ECI i ECH no ta kapas pa kumpli kompletamente ku nan obligashonnan na e kompanianan di seguro. ECI a invertí gran parti di plaka di aseguradonan den un tereno na St.Maarten ku apénas ta desaroyá i ku no ta produciendo niun entrada tampoko. Awor ta resultá ku balor di e tereno aki ta supstansialmente mas abou ku loke tin indiká den bukinan di ENNIA. ENNIA ta indiká ku e tereno tin un balor di NAF 771 mion.

CBCS a laga Cushman & Wakefield, un di e kompanianan di mas renombrá na mundu pa loke ta trata trabou di taksashon, balorá e tereno i nan konklushon ta ku e tereno na St.Maarten su balor ta NAf 89 mion. Ku otro palabra ENNIA a sobre balorá e tereno ku un montante di NAf 682 mion. Ta bon pa menshoná ku na 2016 ENNIA mes a laga un di e kompanianan di mas grandi na mundu den taksashon ku ta CBRE balorá e mesun tereno, pero a pone resultado un banda ora ku a sali na kla ku e ta kasi meskos ku loke Cushman & Wakefield a presentá.

Banda di esei ta asina ku ECI a invertí fondonan di pólisa den akshonnan, pero ta un parti masha limitá di e benta a bai pa e kompanianan di seguro. Esaki a sosodé di e siguiente forma. Na 2005 sr. Ansary ku ta e akshonista mayoritario di Parman a funda e kompania Stewart & Stevenson LLC (S&S), ku e meta pa kumpra e kompania Stewart & Stevenson Inc.

A invertí fondonan di e kompanianan di seguro, pa medio di ECI, den akshonnan di Stewart & Stevenson Inc. Na 2017 a bende tur akshon di Stewart & Stevenson Inc. pa un montante di alrededor di NAf 1.36 miar. Di e plaka di benta aki e kompanianan di seguro mester a haña mas o ménos NAf 1 miar konsiderando ku plaka for di pólisanan a finansiá alrededor di 74% di e invershon . Pero e kompanianan di seguro a haña apénas NAf 516 mion, loke ta representá un daño na e kompanianan di NAf 489 mion.

Na fin di yüni 2018 a konstatá un défisit di solvensia na ECL di kasi NAf 1.4 miar, tambe a konstatá défisit di solvensia na ECS di NAf 35 mion i na ECZ e défisit di solvensia tabata NAf 11 mion. ENNIA mes a kalkulá e défisit di solvensia serka e kompanianan di seguro a base di su kuenta anual di 2016 i a yega na e montante di NAf 1.5 miar.

Ta bon pa enfatisá ku un défisit di solvensia no ta nifiká ku tin tambe un défisit di likides. E kompanianan di seguro asina ku por dispone di e kuantanan na e banko merikano Merrill Lynch(ML), lo tin suficiente likides pa nan por sigui kumpli ku nan obligashon di pago. Défisit di solvensia ta enserá ku kumplimentu ku obligashon di pago por resultá den problema riba término.

### **Areglo di emergensia**

CBCS pa años a tuma medida kontra ENNIA pa asina limitá claim di e kompanianan di seguro riba ECI i ECH, i na tambe pa pèrkurá ku ta invertí fondonan di asegurado na un manera diversifiká i responsabel. Tambe a tuma medidanan pisá manera ponementu di ENNIA bou di kuratela silensioso, sinembargo sin e resultado deseá. Korte a bai di akuerdo pa dekretá areglo di emergensia despues negosiashonnan ku gerensia di ENNIA i sr. Ansary a faya i Ansary a duna enkargo pa saka un suma di USD 100 mion, ku ta plaka di pólisanan for di e grupo di kompania. Tabatin un òrdu pa saka na tur USD 250

mion. Despues ku korte a dekretá e areglo di emergensia a manda e suma di 100 mion dòler bek, di kua 50 mion dòler a bini di un kuenta personal di sr. Ansary. Ta parse pues ku sr. Ansary a haña disposishon personalmente di a lo menos un parti di e 100 mion dòler.

### **Purifikashon di Défisit di solvensia**

CBCS, bou di e areglo di emergensia, ta tumando tur medida nesesario kaba pa solushoná e situashon di e défisit di solvensia. Mester pone plaka di aseguradonan ku a saka for di e kompanianan na disposishon di e kompania di seguro bèk. Seguidamente mester invertí e fondonan aki na un manera responsabel, kaminda e rendimentu realmente ta bai na fabor di e kompania di seguro.

### **Konsekuensia di fris kuantanan na Merrill Lynch**

Un parti supstansial di e fondonan di aseguradonan, kual a usa pa invertí, ta riba kuantanan na ML na Merka. E invershonnan aki, kual medianan di komunikashon a dediká basta atenshon na dje, a keda hasi a base di ENNIA su propio maneho di invershon. CBCS na vários okashon a hala atenshon di ENNIA pa nan forma di hasi invershon ku na opinion di CBCS no ta prudente i ta di un karakter di hopi rísiko. Invershon den akshon tin un profil di mas riesgo kompará ku invershon den bono i 'mutual funds'. E invershonnan aktual ta ekstremadamente riesgoso i ademas nan ta konsentrá den kuater tipo di akshon. Un di e tiponan di akshon asta ta kubri 50% di e total na invershon. Mirando e rísikonan a pone ku CBCS kier a haña aksesu hopi lihé na e invershonnan aki despues ku a dekretá e areglo di emergensia. Sinembargo ML a fris e kuantanan pa asina nan por investigá ken realmente tin derecho riba e fondonan riba e kuantanan. For di e momentu ei Parman i su akshonista mayoritario ku ta sr. Ansary no kier a konfirmá ku ta CBCS, ku e areglo di emergensia den man, ta esun ku tin derecho riba e fondonan. Esei a pone ku ML a mantené e kuantanan di fris i ku CBCS mester a entamá e kaso na New York pa haña rekonosementu di e areglo di emergensia riba teritorio Merikano i aktuamente ta prosediendo pa haña aksesu pleno na e kuantanan na ML.

E balor di e invershonnan riesgoso a baha ku alrededor di USD 36 mion (NAf 65 mion) riba 9 di yanüari 2019, ku ta nèt e dia promé ku e huisio sumario ku Parman a entamá kontra CBCS. E bahada ta kompará ku 3 di yüli 2018 kual ta e dia riba kua a dekretá e areglo di emergensia. Pues ta kompletamente inkorekto e informashon ku e akshonnan lo a pèrdè NAf 150 mion na balor. Ademas, pèrdida di balor ta bira real te na momentu ku bende e akshonnan.

### **Progreso restrukturashon ENNIA**

For di momentu ku a dekretá e areglo di emergensia CBCS, a base di su propio investigashon, a haña mihó bista riba moveshon di plaka, transakshonnan, gastunan di operashon, lantamentu di plaka, den e balor real di aktivonan di e grupo ENNIA. Ademas iregularidatnan ku a keda konstatá ta keda investigá na e momentunan aki. Personanan responsabel den e kuadro aki lo keda persiguí tantu sivil komo penal. Na mes momentu ta asina ku e diferente prosedimentunan hudisial ku Parman a inisiá na Kòrsou kontra di CBCS, a kondusí na tardansa. Ademas CBCS mester prosedé na Merka pa asina por haña aksesu na e fondonan di ENNIA na Merka. Apesar ku e veredikto di e wes Merikano, di dia 20 di desèmber último, ta na fabor di CBCS, tòg e manera ku Parman a posishoná su mes a kousa gran tardansa na e proseso.

### **Meta di restrukturashon bou di areglo di emergensia**

Centrale Bank van Curaçao en Sint Maarten ta keda hasi tur loke ta na su alkanse pa rekuperá e solvensia di ENNIA, ku e meta prinsipal ku ENNIA lo sigui kumpli ku su aseguradonan riba término kòrtiku i riba término largu. CBCS komo e instituto ku ta supervishona sektor finansiero na Kòrsou i St.Maarten tin komo tarea pa kuida e interes públiko. Den esaki e interes di aseguradonan ta konta semper riba e interes di akshonista. Pa preguntanan ku ta trata e restrukturashon di ENNIA, por tuma kontakto via di e-mail [cbcs@centralbank.cw](mailto:cbcs@centralbank.cw)

Willemstad, 13 yanüari 2019

CENTRALE BANK VAN CURACAO EN SINT MAARTEN